

摘藻堂四庫全書薈要

史部

欽定四庫全書薈要

史部

北史卷四

詳校官內閣侍讀臣孫球



欽定四庫全書蒼要卷四千八百十五

史部

北史卷四

唐

李

延

壽

撰

魏本紀第四

世宗宣武皇帝諱恪孝文皇帝第二子也母曰高夫人

初夢為日所逐避於牀下日化為龍繞已數匝寤而驚
悸遂有娠太和七年閏四月生帝於平城宮二十一年
正月景申立為皇太子二十三年四月景午孝文帝崩

丁巳太子即皇帝位諒闇委政宰輔五月高麗國遣使
朝貢六月乙卯分遣侍臣巡行州郡問人疾苦考察守
令黜陟幽明褒禮名賢戊辰追尊皇妣曰文昭皇后秋
八月戊申遵遺詔孝文皇帝三夫人已下悉免歸家癸
丑增宮臣位一級冬十月癸未鄧至國王象舒彭來朝
景戌謁長陵丁酉享太廟十一月幽州人王惠定聚衆
反自稱明法皇帝刺史李肅捕斬之是歲州鎮十八水
饑分遣使者開倉振恤

景明元年春正月辛丑朔日有蝕之壬寅謁長陵乙巳
大赦改元丁未齊豫州刺史裴叔業以壽春內屬二月
戊戌復以彭城王勰為司徒齊將胡松李居士軍屯宛
陳伯之水軍逼壽春夏四月丙申司徒彭城王勰車騎
將軍王肅大破之己亥皇弟怵薨五月甲寅北鎮饑遣
兼侍中揚播巡撫振恤六月景子以司徒彭城王勰為
大司馬秋七月己亥朔日有蝕之齊將陳伯之寇淮南
八月乙酉彭城王勰破伯之於肥口九月齊州人抑世

明聚衆反冬十月丁卯朔謁長陵庚寅齊兗二州討世
明平之丁亥改授彭城王勰司徒錄尚書事十一月丁
巳陽平王頤薨是歲州鎮十七大饑分遣使者開倉振
恤高麗吐谷渾等國竝遣使朝貢

二年春正月景申朔謁長陵庚戌帝始親政遵遺詔聽
司徒彭城王勰以老歸第進太尉咸陽王禧位太保以
司空北海王詳為大將軍錄尚書事丁巳引見羣臣於
太極前殿告以覽政之意壬戌以太保咸陽王禧領太

尉以大將軍廣陵王羽為司空分遣大使黜陟幽明二月庚午進宿衛之官位一級甲戌大赦三月乙未朔詔以比年連有軍旅正調之外皆蠲罷壬戌青齊徐兗四州大饑人死者萬餘口是月齊雍州刺史蕭衍奉其南康王寶融為主東赴建鄴夏五月壬子廣陵王羽薨壬戌太保咸陽王禧謀反賜死六月丁亥考諸州刺史加以黜陟秋七月癸巳朔日有蝕之乙巳蠕蠕犯塞辛酉大赦九月丁酉發畿內夫五萬五千人築京師三百二

十坊四旬罷己亥立皇后于氏乙卯免壽春營戶竝隸揚州冬十一月景申以驃騎大將軍穆亮為司空丁酉以大將軍北海王詳為太傅領司徒壬寅改築圓丘於伊水之陽乙卯仍有事焉十二月齊直後張齊殺其主蕭寶卷以降蕭衍是歲高麗吐谷渾等國竝遣使朝貢三年春二月戊寅以旱故詔州郡掩骸骨三月齊建安王寶夤來奔夏四月詔撫軍將軍李宗討魯陽反蠻齊主蕭寶融遜位於梁閏四月丁巳司空穆亮薨秋七月

丁巳朔日有蝕之八月丁卯以前太傅平陽公元丕為
三老九月丁巳行幸鄴丁卯詔使者弔比干墓戊寅閱
武於鄴南冬十月庚子帝躬御弧矢射遠及一里五十
步羣臣勒銘於射所甲辰車駕還宮十二月壬寅以太
極前殿初成饗羣臣賜布帛有差是歲河州大饑死者
二千餘口西域二十七國竝遣使朝貢

四年春正月乙亥親耕藉田三月己巳皇后先蠶於北
郊四月癸未朔以蕭寶夤為東揚州刺史封丹陽郡公

齊王庚寅南天竺國獻辟支佛牙戊戌為旱故命鞠寃
獄己亥減膳徹懸辛丑澍雨大洽五月甲戌行梁州事
揚椿大破反氏六月壬午朔封皇弟悅為汝南王秋七
月乙卯三老平陽公元丕薨庚午詔復收鹽池利辛未
以彭城王勰為太師八月勿吉國貢楛矢冬十一月己
未封武興國世子楊紹先為武興王

正始元年春正月景寅大赦改元夏五月丁未朔太傅
北海王詳以罪廢為庶人六月以旱故徹樂減膳癸巳

詔有司修案舊典祇行六事甲午帝以旱故親薦享於
太廟戊戌詔立周旦夷齊廟於首陽山庚子以旱故公
卿以下引咎責躬又錄京師見囚殊死以下皆減一等
鞭杖之坐悉原之秋七月景子假鎮南將軍李崇大破
諸蠻八月景子假鎮南將軍元英破梁將馬仙理於義
陽詔洛陽令有大事聽面敷奏乙酉元英攻拔義陽辛
卯英又大破梁軍仍清三關丁酉封英為中山王九月
詔諸州蠲停徭役不得橫有徵發蠕蠕犯塞詔左僕射

源懷討之冬十月乙未詔斷羣臣白衣募吏十一月戊
午詔有司依漢魏舊章營繕國學十二月景子以苑牧
公田分賜代遷戶己卯詔羣臣議定律令閏月癸卯朔
行梁州事夏侯道遷據漢中來降乙丑以高陽王雍為
司空是歲高麗遣使來朝貢

二年春正月景子封宕昌世子梁彌博為宕昌王二月
梁州氏蜀反絕漢中運路州刺史邢巒頻大破之夏四
月己未城陽王鸞薨乙丑詔曰中正所銓但為門第吏

部彛倫仍不才舉八坐可審議往代擢賢之體必令才
學竝申資望兼致邢巒遣統軍王足西伐頻破梁諸軍
遂入劔閣秋七月戊子王足擊破梁軍因逼涪城八月
壬寅詔中山王英南討襄沔冬十一月戊辰朔武興王
揚紹先叔父集起謀反詔光祿大夫楊椿討之王足圍
涪城益州諸郡戍降者十二三送編籍者五萬餘戶既
而足引軍退是歲鄧至國遣使朝貢

三年春正月丁卯朔皇子昌生大赦壬申梁秦二州刺

史邢巒連破氐賊剋武興秦州人王智等聚衆自號王公尋推秦州主簿呂苟兒為主年號建明己卯揚集起兄弟相率降二月景辰詔求讜言戊午詔右衛將軍元麗等討呂苟兒三月己巳以戎旅興詔停諸作己卯樂良王長命坐殺人賜死庚寅平南將軍曲江縣公陳伯之自梁城南奔夏四月丁未詔罷鹽池禁五月景寅詔以時澤未降春稼已旱或有孤老餒疾無人贍救因以致死暴露溝塹者令洛陽部尉依法棺埋秋七月庚辰

元麗大破秦賊降呂苟兒及其王公三十餘人秦涇二
州平戊子中山王英大破梁徐州刺史王伯敷於陰陵
己丑詔發定冀瀛相并肆六州卒十萬以濟南軍八月
壬寅安東將軍邢巒破梁將桓和於孤山諸將所在剋
捷兗州平壬戌曲赦涇秦岐涼河五州九月癸酉邢巒
大破梁軍於淮南遂攻鍾離冬十一月甲子帝為京兆
王愉清河王懌廣平王懷汝南王悅講孝經於式乾殿
是歲高麗蠕蠕國竝遣使朝貢

四年夏四月戊戌鍾離大水中山王英敗績而還六月
己丑朔詔有司準前式置國子立太學樹小學於四門
秋八月己亥中山王英齊王蕭寶夤坐鍾離敗除名辛
丑敦煌人饑詔開倉振恤九月己未詔以徙正宮極庸
績未酬以司空高陽王雍為太尉尚書令廣陽王嘉為
司空百官悉進位一級庚申夏州長史曹明謀反伏誅
甲子開斜谷舊道景戌司州人饑詔開倉振恤閏月甲
午禁大司馬門不得車馬出入冬十月丁卯皇后于氏

崩自碣石至於劔閣東西七千里置二十二郡尉是歲
西域東夷四十餘國竝遣使朝貢

永平元年春三月戊子皇子昌薨景午以去年旱儉遣
使者所在振恤夏五月辛卯帝以旱故減膳徹懸六月
壬申詔依洛陽舊圖修聽訟觀秋七月甲午立夫人高
氏為皇后八月壬子朔日有蝕之癸亥冀州刺史京兆
王愉據州反丁卯大赦改元九月景戌復前中山王英
本封戊戌殺太師彭城王勰癸亥假鎮北將軍李平剋

信都冀州平冬十月豫州彭城人白早生殺刺史司馬
悅據城南叛十二月己未尚書邢巒劾懸瓠斬早生禽
梁將齊苟兒等是歲北狄東夷西域十八國竝遣使朝
貢高昌國王麴嘉表求內徙

二年春正月涇州沙門劉慧汪聚衆反詔華州刺史奚
康生討之夏四月己酉武川鎮饑詔開倉振恤甲子詔
緣邊州鎮自今一不聽寇盜境外犯者罪同境內五月
辛丑帝以旱故減膳徹懸禁斷屠殺甲辰幸華林都亭

錄囚徒死罪以下降一等六月辛亥詔曰江海方同車
書宜一諸州軌轍南北不等今可申救四方遠近無二
秋八月景午朔日有蝕之戊申以鄧至國世子像覽蹄
為其國王九月辛巳封故北海王子顥為北海王壬午
詔定諸門閨名冬十月癸丑以司空廣陽王嘉為司徒
庚午郢州獻七寶牀詔不納冬十一月甲申詔禁屠殺
含孕以為永制己丑帝於式乾殿為諸僧朝臣講維摩
詰經十二月詔五等諸侯其同姓者出身公正六下侯從

六上伯從六下子正七上男正七下異族出身公從七
上侯從七下伯正八上子正八下男從八上清修出身
公從八下侯正九上伯正九下子從九上男從九下是
歲西域東夷二十四國竝遣使朝貢

三年春二月壬子秦州沙門劉光秀謀反州郡捕斬之
癸亥秦州隴西羌殺鎮將趙儁反州軍討平之三月景
戌皇子誦生大赦夏四月平陽郡之禽昌襄陵二縣大
疫自正月至此月死者二千七百三十人五月丁亥冀

定二州旱儉詔開倉振恤六月壬寅詔重求遺書於天
下冬十月辛卯中山王英薨景申詔太常立館使京畿
內外疾病之徒咸令居處嚴敕醫署分師救療考其能
否而行賞罰又令有司集諸醫工惟簡精要取三十卷
以班九服十二月辛巳江陽王繼坐事除名甲申詔於
青州立孝文皇帝廟殿中侍御史王敞謀反伏誅是歲
西域東夷北狄十六國竝遣使朝貢

四年春正月丁巳汾州劉龍駒聚衆反詔諫議大夫薛

和討之二月壬午青齊徐兗四州人饑甚遣使振恤三月壬戌司徒廣陽王嘉薨夏四月梁遣其鎮北將軍張稷及馬仙琕寇朐山詔徐州刺史盧昶率衆赴之五月己亥遷代京銅龍置天泉池西景辰詔禁天文學冬十一月朐山城陷盧昶大敗而還十二月壬戌朔日有蝕之是歲西域東夷北狄二十九國竝遣使朝貢

延昌元年春正月乙巳以頻年水旱百姓饑敝分遣使者開倉振恤景辰以尚書令高肇為司徒清河王懌為

司空三月甲午州郡十一大水詔開倉振恤以京師穀
貴出倉粟八十萬石以振恤貧者己未安樂王詮薨夏
四月詔以旱故斷食粟之畜丁卯詔曰遷京嵩縣年將
二紀博士端然虛祿靖言念之有兼愧慨可嚴敕有司
國子學孟冬使成太學四門明年暮春令就戊辰以旱
故詔尚書與羣司鞠理獄訟辛未詔饑人就穀六鎮丁
丑帝以旱故減膳徹懸癸未詔曰肆州地震陷裂死傷
甚多亡者不可復追生病宜加療救可遣太醫折傷醫

并給所須藥就療乙酉大赦改元詔立理訴殿申訟車

以盡冤窮之理五月景午詔天下有粟之家供年之外

悉貸饑人自二月不雨至於是月己未晦日有蝕之六

月壬申澍雨大洽戊寅通河南牝馬之禁庚辰詔出太

倉粟五十萬石以賑京師及州郡饑人冬十月乙亥立

皇子詡為皇太子十一月景申詔以東宮建賜天下為

父後者爵一級孝子順孫廉夫節婦旌表門閭量給粟

帛十二月己巳詔守宰為御史彈赦免者及考在中第

皆代之是歲西域東夷十國竝遣使朝貢

二年春正月戊戌帝御申訟車親理寃訟二月景辰朔
振恤京師貧人甲戌以六鎮大饑開倉拯贍已郊進太
尉高陽王雍位太保閏月辛丑以苑牧地賜代遷人無
田者是春人饑死者數萬口夏四月庚子以絹十五萬
疋振河南郡人五月甲寅朔日有蝕之是月壽春大水
遣平東將軍奚康生等步騎數千赴之六月乙酉青州
人饑詔使者開倉振恤甲午曲赦揚州辛亥帝御申訟

車親理寃訟是夏十三郡大水秋八月辛卯詔以水旱饑儉百姓多陷罪辜降死以下刑九月景辰以貴族豪門崇習奢侈詔尚書嚴立限級節其流宥冬十月詔以恒肆地震人多死傷重丐一年租賦十二月景戌丐洛陽河陰二縣租賦乙巳詔以恒肆地震人多離災其有課丁沒盡老幼單立家無受復者各賜廩粟以接來稔是歲東夷西域十餘國竝遣使朝貢

三年春二月乙未詔曰肆州秀容郡敷城縣鴈門郡原

平縣竝自去年四月以來山鳴地震于今不已告譴彰
咎朕甚懼焉可恤瘼寬刑以荅災譴夏四月青州人饑
辛巳開倉振恤乙巳上御申訟車親理寬訟秋八月甲
申帝臨朝堂考百司而加黜陟冬十一月辛亥詔司徒
高肇為大將軍平蜀大都督步騎十五萬西伐益州丁
巳幽州沙門劉僧紹聚衆反自號淨居國明法王州郡
捕斬之十二月庚寅詔立明堂是歲東夷西域八國竝
遣使朝貢

四年春正月甲寅帝不豫丁巳崩于武乾殿時年三十

三二月甲戌朔上尊諡曰宣武皇帝廟號世宗甲午葬景陵帝幼有大度喜怒不形於色雅性儉素初孝文欲觀諸子志尚大陳寶物任其所取京兆王愉等皆競取珍玩帝唯取骨如意而已孝文大竒之及庶人恂失德孝文謂彭城王勰曰吾固疑此兒有非常志相今果然矣乃見立為儲貳雅愛經史尤長釋氏之義每至講論連夜忘疲善風儀美容貌臨朝深嘿端嚴若神有人君

之量矣

肅宗孝明皇帝諱詡宣武皇帝之第二子也母曰胡充
華永平三年三月景戌生於宣光殿之東北有光照於
庭中延昌元年十月乙亥立為皇太子四年正月丁巳
宣武帝崩是夜太子即皇帝位戊午大赦己未徵下西
討東防諸軍庚申詔太保高陽王雍入居西柏堂決庶
政以任城王澄為尚書令百官總已以聽二王二月庚
辰尊皇后高氏為皇太后辛巳司徒高肇至京師以罪

賜死癸未進太保高陽王雍位太傅領太尉以司空清
河王懌為司徒以驃騎大將軍廣平王懷為司空己亥
尊胡充華為皇太妃三月甲辰朔皇太后出俗為尼徒
御金墉城景辰詔進宮臣位一級乙丑進文武羣官位
一級夏六月沙門法慶聚眾反於冀州殺阜城令自稱
大乘秋八月乙亥領軍于忠矯詔殺左僕射郭祚尚書
裴植免太傅高陽王雍官以王還第景子尊皇太妃為
皇太后戊子帝朝太后於宣光殿大赦己丑進司徒清

河王懌為太傅領太尉以司空廣平王懷為太保領司
徒任城王澄為司空庚寅以車騎大將軍于忠為尚書
令特進崔光為車騎大將軍竝儀同三司壬辰復江陽
王繼本國復濟南王彧先封為臨淮王羣臣奏請皇太
后臨朝稱制九月乙巳皇太后親覽萬機甲寅征西大
將軍元遙破斬法慶傳首京師安定王燮薨冬十二月
辛丑以高陽王雍為太師己酉鎮南將軍崔亮破梁將
趙祖悅軍遂圍破石丁卯帝皇太后謁景陵是歲東夷

西域北狄十八國竝遣使朝貢

熙平元年春正月戊辰朔大赦改元荆沔都督元志大破梁軍以吏部尚書李平為行臺節度討硤石諸軍三月乙巳鎮東將軍蕭寶夤大破梁將於淮北癸亥初聽秀才對策第中上巳上叙之乙丑鎮南崔亮鎮軍李平等剋硤石斬趙祖悅傳首京師盡俘其衆三月戊辰朔日有蝕之夏四月戊戌以瀛州人饑開倉振恤五月丁卯朔以炎旱命釐察獄訟權停作役庚午詔放華林野

獸於山澤秋七月庚午重申殺牛禁八月景午詔古帝
諸陵四面各五十步勿聽耕稼九月丁丑淮堰破梁緣
淮城戍村落十餘萬口皆漂入海是歲吐谷渾宕昌鄧
至高昌陰平等國竝遣使朝貢

二年春正月大乘餘賊復相聚攻瀛州刺史宇文福討
平之甲戌大赦庚寅詔遣大使巡行四方問疾苦恤孤
寡黜陟幽明二月丁未封御史中尉元匡為東平王三
月丁亥太保領司徒廣平王懷薨夏四月丁酉詔京尹

所統年高者板賜郡各有差戊申以開府儀同三司胡國珍為司徒乙卯皇太后幸伊闕石窟寺即日還宮改封安定王超為北平王五月庚辰重申天文禁犯者以大辟論秋七月乙亥儀同三司汝南王悅坐殺人免官以王還第己巳享太廟八月戊戌宴道武以來宗室年十五以上於顯陽殿申家人禮己亥詔庶族子弟年未十五不聽入仕庚子詔咸陽京兆二王子女還附屬籍丁未詔太師高陽王雍入居門下參決尚書奏事冬十

月以幽冀滄瀛光五州饑遣使巡撫開倉振恤是歲東夷西域氐羌等十一國竝遣使朝貢

神龜元年春正月甲子詔以氐酋揚定為陰平王壬申詔給京畿及諸州老人板郡縣各有差及賜鰥寡孤獨粟帛庚辰詔以雜役戶或冒入清流所在職人皆令五人相保無人任保者奪官還役乙酉秦州羌反幽州大饑死者三千七百九十人詔刺史開倉振恤二月己酉詔以神龜表瑞大赦改元東益州氐反三月南秦州氐

反夏四月丁酉司徒胡國珍薨甲辰改封江陽王繼為
京兆王六月自正月不雨是月辛卯澍雨乃降秋七月
河州人却鐵忽聚衆反自稱水池王閏月甲辰開恒州
銀山禁八月癸丑朔詔京師見囚殊死以下悉減一等
甲子却鐵忽詣行臺源子恭降九月戊申皇太后高氏
崩于瑤光寺冬十月丁卯以尼禮葬高太后於芒山十
二月辛未詔曰人生有終下歸兆域京邑隱振口盈億
萬貴賤依憑未有定所今制乾脯山以西擬為九原是

歲東夷西域北狄十一國竝遣使朝貢

二年春正月辛巳朔日有蝕之丁亥詔曰皇太后撫挹
自居稱號弗備宜遵舊典稱詔宇內以副黎蒸元元之
望是月改葬文昭皇太后高氏二月乙丑齊郡王祐薨
庚午羽林千餘人焚征西將軍張彝第毆傷彝燒殺其
子均乙亥大赦丁丑詔求直言壬寅詔以旱故命依舊
雩祈察理寃獄掩骼埋骼振窮恤寡三月甲辰澍雨大
洽夏五月戊戌以司空任城王澄為司徒京兆王繼為

司空秋八月乙未御史中尉東平王匡坐事削除官爵
九月庚寅皇太后幸嵩高山癸巳還宮冬十一月癸丑
司徒任城王澄薨庚申大赦詔除淫祀焚諸雜神是歲
吐谷渾宕昌噉唃等國竝遣使朝貢

正光元年春正月乙亥朔日有蝕之夏四月景辰詔尚
書長孫承業巡撫北蕃觀察風俗五月辛巳以炎旱故
詔八座鞠見囚申枉濫秋七月景子侍中元乂中常侍
劉騰奉帝幸前殿矯皇太后詔歸政遜位乃幽皇太后

北宮殺太傅清河王懌總勒禁旅決事殿中辛卯帝加
元服大赦改元內外百官進位一等八月甲寅相州刺
史中山王熙舉兵欲誅騰不果見殺九月壬申蠕蠕主
阿那瓌來奔戊戌以太師高陽王雍為丞相冬十月乙
卯以儀同三司汝南王悅為太尉十一月己亥封阿那
瓌為朔方郡公蠕蠕主十二月壬子詔送蠕蠕主阿那
瓌歸北辛酉以司空京兆王繼為司徒

二年春正月南秦州氐反二月車駕幸國子學講孝經

三月庚午幸國子學祠孔子以顏回配甲午右衛將軍
奚康生於禁中將殺元又不果為又所害以儀同三司
劉騰為司空夏四月庚子進司徒京兆王繼位太保壬
寅以儀同三司崔光為司徒五月丁酉朔日有蝕之秋
七月癸丑以旱故詔有司修案舊典祇行六事八月己
巳蠕蠕後主郁久閭侯匿代來奔懷朔鎮十二月甲戌
詔司徒崔光安豐王延明等議定服章庚辰以東益南
秦州氏反詔河間王琛討之失利是歲烏菴居密波斯

高昌勿吉伏羅高車等國竝遣使朝貢

三年春正月辛亥耕藉田夏四月庚辰以高車國主覆
羅伊訶為鎮西將軍西海郡公高車國王五月壬辰朔
日有蝕之六月己巳以旱故詔分遣有司馳祈岳瀆及
諸山川百神能興雲雨者命理寃獄止土功減膳徹懸
禁止屠殺冬十一月己丑朔日有蝕之乙巳祀圓丘景
午詔班歷大赦十二月癸酉以太保京兆王繼為太傅
司徒崔光為太保是歲波斯不漢龜茲吐谷渾竝遣使

朝貢

四年春二月壬申追封故咸陽王禧為敷城王京兆王
愉為臨洮王清河王懌為范陽王以禮加葬丁丑河間
王琛章武王融竝以貪污削爵除名己卯蠕蠕主阿那
瓌率衆犯塞遣尚書左丞元孚為北道行臺持節喻之
蠕蠕後主郁久閭侯匿代來朝司空劉騰薨夏四月阿
那瓌執元孚北遁秋八月癸未追復故范陽王懌為河
間王九月丁酉詔太尉汝南王悅入居門下與丞相高

陽王雍參決尚書奏事冬十一月癸未朔日有蝕之景
申趙郡王謚薨丁酉太保崔光薨十二月以太尉汝南
王悅為太保徐州刺史北海王顥坐貪汙削爵除官是
歲宕昌庫莫奚國竝遣使朝貢

五年春正月辛丑祀南郊三月沃野鎮人破六韓拔陵
反聚衆殺鎮將號真王元年夏四月高平酋長胡琛反
自稱高平王攻鎮以應拔陵別將盧祖遷擊破之五月
都督北征諸軍事臨淮王彧攻討敗於五原削除官爵

壬申詔尚書令李崇為大都督率廣陽王淵等北討六月秦州城人莫折大提據城反自稱秦王殺刺史李彥大提尋死子念生代立僭稱天子年號天建置立百官丁酉大赦秋七月戊午復河間王琛臨淮王彧本封是月涼州幢帥于菩提呼延雄執刺史宋穎據州反念生遣其兄高陽王天生下隴東寇八月甲午雍州刺史元志西討大敗於隴東退守岐州景申詔諸州鎮軍元非犯配者悉免為編戶改鎮為州依舊立稱九月壬申詔

尚書左僕射齊王蕭寶夤為西道行臺大都督復撫軍
北海王顥官爵為都督竝率諸將西討乙亥帝幸明堂
餞寶夤等吐谷渾主伏連籌遣兵討涼州于菩提走追
斬之城人趙天安復推宋顥為刺史冬十月營州城人
劉安定就德興據城反執刺史李仲遵城人王惡兒斬
安定以降德興東走自號燕王十二月詔太傅京兆王
繼為太師大將軍率諸將西討汾州正平平陽胡叛逆
詔復征東將軍章武王融封爵為大都督率衆討之莫

折念生遣兵攻涼州城人趙天安復執刺史以應之是歲噉啗契丹地豆千庫莫奚等國竝遣使朝貢

孝昌元年春正月庚申徐州刺史元法僧據城反自稱宋王年號天啓遣其子景仲歸梁梁遣其將豫章王綜入守彭城法僧擁其僚屬南入詔臨淮王彧尚書李憲為都督安豐王延明為東道行臺俱討徐州癸亥蕭寶夤及征西將軍崔延伯大破賊於黑水天生退走入隴涇岐及隴悉平以太師大將軍京兆王繼為太尉二月

詔追復故樂良王長命爵以其子忠紹之戊戌大赦三
月甲戌詔五品以上各薦所知夏四月辛卯皇太后復
臨朝攝政引羣臣面陳得失壬辰征西將軍都督崔延
伯大敗於涇州戰歿六月癸未大赦改元蠕蠕主阿那
瓌大破拔陵是月諸將逼彭城蕭綜夜潛出降梁諸將
奔退衆軍追躡免者十一二秋八月癸酉詔斷遠近貢
獻珍麗違者免官柔玄鎮人杜洛周反於上谷年號真
王九月乙卯詔減天下諸調之半壬戌詔五品以上各

舉所知辛未曲赦南北秦州冬十月蠕蠕遣使朝貢十一月辛亥詔父母年八十以上者皆聽居官時四方多事諸蠻復反十二月山胡劉蠡升反自稱天子

二年春正月庚戌封廣平王懷長子誨為范陽王壬子以太保汝南王悅領太尉是月五原鮮于修禮反於定州年號魯興二月甲申帝及皇太后臨大夏門親覽寬訟三月庚子追復中山王熙本爵以其子叔仁紹之夏四月大赦戊申北討都督河間王琛長孫承業失利奔

還詔竝免官爵五月丁未車駕將北討內外戒嚴前給
事黃門侍郎元略自梁還朝封義陽王以丞相高陽王
雍為大司馬六月己巳曲赦齊州絳蜀陳雙熾聚衆反
自號始建王曲赦平陽建興正平三郡詔假鎮西將軍
都督長孫承業討雙熾平之丙子改封義陽王略為東
平王戊寅詔復京兆王繼本封江陽王戊子詔曰自運
屬艱棘歷載於茲朕威德不能遐被經略無以及遠何
以苟安黃屋無愧黔黎今便避居正殿蔬飧素服當親

自招募收集忠勇其有直言正諫之士敢決徇義之夫
二十五日悉集華林東門人別引見共論得失秋八月
景子進封廣川縣公元邵為常山王戊子進武城縣公
子攸為長樂王癸巳賊帥元洪業斬鮮于修禮請降為
賊黨葛榮所殺九月辛亥葛榮敗都督廣陽王深章武
王融於博野白牛邏融歿於陣榮自稱天子國號齊年
稱廣安冬十一月戊戌杜洛周攻陷幽州執刺史王延
年及行臺常景景午稅京師田租畝五升借賃公田者

畝一斗閏月稅市人出入者各一錢店舍為五等梁將
元樹逼壽春揚州刺史李憲力屈而降初留州縣及長
史司馬戍主副質子於京師詔頃舊京淪覆中原喪亂
宗室子女屬籍在七廟內為雜戶濫門拘辱者悉聽離
絕是歲疊伏羅庫莫奚國竝遣使朝貢

三年春正月甲戌以司空皇甫度為司徒儀同三司蕭
寶夤為司空辛巳葛榮陷殷州刺史崔楷固節死之甲
申詔峻鑄錢之制蕭寶夤大敗于涇州北海王顥尋亦

敗走曲赦關西及正平平陽建興戊子以司徒皇甫度
為太尉己丑以四方未平詔內外戒嚴將親征二月丁
酉詔開輸賞格輸粟入瀛定岐雍四州者官斗二百斛
賞一階入二華州者五百石賞一階不限多少粟畢授
官虜賊據潼關三月甲子詔將西討中外戒嚴虜賊走
復潼關秋七月相州刺史安樂王鑒據州反己丑大赦
八月都督源子邕李神軌裴衍攻鄴丁未斬鑒相州平
九月己未東豫州刺史元慶和以城南叛秦州城人杜

粲殺莫折念生自行州事冬十月戊申曲赦恒農巴西
河北正平平陽邵郡及關西諸州軍甲寅雍州刺史蕭
寶夤據州反自號齊年稱隆緒十一月己丑葛榮攻陷
冀州執刺史元孚逐出居人凍死者十六七十二月戊
申都督源子邕裴衍與榮戰敗於陽平東北竝歿是月
杜粲為駱超所殺超遣使歸罪是歲蠕蠕遣使朝貢
武泰元年春正月乙丑生皇女祕言皇子景寅大赦改
元丁丑雍州人侯終德相率攻蕭寶夤寶夤度渭走雍

州平二月癸丑帝崩於顯陽殿時年十九甲寅皇子即位大赦皇太后詔曰皇家握歷受圖年將二百祖宗累聖社稷載安高祖以文思先天世宗以下武繼世大行在御重以寬仁奉養率由溫明恭順寶望穹靈降祐麟趾衆繁自潘充華有孕椒宮冀誕儲兩而熊羆無兆唯虺遂彰于時直以國步未康假稱統盾欲以底定物情係仰宸極何圖一旦弓劍莫追皇曾孫故臨洮王寶暉世子釗體自高祖天表卓異大行平日養愛特深義齊

若子事符當璧允膺大寶即日踐阼可班宣遠邇咸使
知之乙卯幼主即位儀同三司大都督尔朱榮抗表請
入奔赴勒兵而南是月杜洛周為葛榮所并三月甲申
上尊諡曰孝明皇帝乙酉葬於定陵廟號肅宗四月戊
戌尔朱榮濟河庚子皇太后幼主崩

論曰宣武承聖考德業天下想望風化垂拱無為邊徼
稽服而寬以攝下從容不斷太和之風替矣比之漢世
安順宣武之後繼以元成孝明沖齡統業靈后婦人專

制任用非人賞罰乖舛於是釁起宇內禍延邦畿卒於
享國不長抑亦淪胥之始也

北史卷四

北史卷四考證

世宗宣武皇帝紀己亥立皇后干氏○干監本訛于今
從魏書改正

秋七月丙子假鎮南將軍李崇大破諸蠻八月丙子假
鎮南將軍元英破梁將馬仙琕於義陽○上丙子魏
書作癸丑此必因下文俱係假鎮南將軍而誤也

冬十一月甲申詔禁屠殺含孕以為永制○上既書冬
十月矣此冬字衍

戊辰以旱故詔尚書與羣司鞫理獄訟○鞫監本訛鞫
今改從南本

肅宗孝明皇帝紀年未十五不聽入仕○仕監本訛任
今改從魏書

壬申詔尚書令李崇為大都督○李監本訛李今從本
傳改正

壬辰征西將軍都督崔延伯大敗于涇州○延監本訛
廷今改從南本

辛未曲赦南北秦州○赦監本訛政今改正

戊寅詔復京兆王繼本封江陽王○繼監本訛維今改
從南本

是歲疊伏羅庫莫奚國並遣使朝貢○庫字下監本脫
莫奚二字今從魏書增入

北史卷四考證

欽定四庫全書蒼要卷四千八百十六

史部

北史卷五

唐

李

延

壽

撰

魏本紀第五

敬宗孝莊皇帝諱子攸彭城王勰之第三子也母曰李
妃明帝初以勰有魯陽翼衛之勲封帝武城縣公幼侍
明帝書於禁中及長風神秀慧姿貌甚美雅為明帝親
待孝昌二年八月進封長樂王歷位侍中中軍將軍以

兄彭城王劭事轉為衛將軍左光祿大夫中書監實見出也武泰元年二月明帝崩大都督尔朱榮謀廢立以帝家有忠勲且兼人望陰與帝通率衆來赴帝與兄弟夜北度河會榮於河陽

永安元年夏四月戊戌帝南濟河即皇帝位以皇兄彭城王劭為無上王皇弟霸城公子正為始平王以尔朱榮為使持節侍中都督中外諸軍事大將軍尚書令領軍將軍領左右封太原王己亥百僚相率有司奉璽綬

備法駕奉迎於河梁西至陶渚榮以兵權在已遂有異志乃害靈太后及幼主次害無上王幼始平王子正又害丞相高陽王雍已下王公卿士二千人列騎衛帝遷於便幕榮尋悔稽顙謝罪辛丑車駕入宮御太極殿大赦改武泰為建義元年壬寅榮表請追謚無上王為皇帝餘死河陰者諸王刺史贈三司三品者令僕五品者刺史七品以下及庶人郡鎮諸死者子孫聽立後授封爵詔從之癸卯以前太尉江陽王繼為太師以司州牧

相州刺史北海王顥為太傅開府仍刺史封光祿大夫

清泉縣侯李延實為陽平王位太保遷太傅以并州刺

史元天穆為太尉封上黨王以儀同三司楊椿為司徒

以儀同三司頓丘郡公穆紹為司空領尚書令進爵為

王以雍州刺史長孫承業為開府儀同三司進爵馮翊

王以殿中尚書元謚為尚書右僕射封魏郡王以給事

黃門侍郎元瑱為東海王甲辰以敷城王坦為咸陽王

以諫議大夫元貴平為東萊王以直閣將軍元肅為魯

郡王以祕書郎中元暉為長廣王以馮翊郡公源紹景復先爵隴西王扶風郡公馮冏東郡公陸子彰北平公長孫悅並復先王爵以北平王超還復為安定王丁未詔中外解嚴庚戌封大將軍尔朱榮次子义羅為梁郡王詔蠕蠕王阿那瓌讚拜不名上書不稱臣是月汝南王悅北海王顥臨淮王或前後奔梁五月丁巳朔以右僕射元羅為東道大使光祿勳元欣副之循方黜陟先行後聞辛酉大將軍尔朱榮還晉陽帝餞於邙陰六月

癸卯以高昌王世子光為平西將軍瓜州刺史襲爵泰
臨縣伯高昌王帝以寇難未夷避正殿責躬徹膳又班
募格收集忠勇有直言正諫之士者集華林園面論時
事幽州平北府主簿河間邢杲率河北流移人萬餘戶
反於北海自署漢王年號天統秋七月乙丑加大將軍
尔朱榮柱國大將軍錄尚書事壬子光州人劉舉聚眾
反於濮陽自稱皇武大將是月高平鎮人万俟醜奴僭
稱大位臨淮王彧自江南還朝八月太山太守羊侃據

郡反甲辰詔大都督宗正珍孫討劉舉平之九月己巳

以齊州刺史元欣為沛郡王壬申柱國大將軍介朱榮

率騎七千討葛榮於滏口破禽之冀定滄瀛殷五州平

乙亥以葛榮平大赦改元為永安辛巳以介朱榮為大

丞相進榮子平昌郡公文殊樂昌郡公文暢爵並為王

以司徒楊椿為太保城陽王徽為司徒冬十月丁亥介

朱榮檻送葛榮於京師帝臨闔闔門榮稽顙謝罪斬於

都市戊戌江陽王繼薨癸丑復膠東縣侯李侃希祖爵

南郡王是月大都督費穆大破梁軍禽其將曹義宗檻送京師梁以北海王顥為魏主年號孝基入據南兗之鉅城十一月戊午以無上王世子韶為彭城王陳留王子寬為陳留王寬弟剛為浮陽王剛弟質為林慮王癸亥行臺于暉等大破羊侃於瑕丘侃奔梁戊寅封前軍元凝為東安王是歲葛榮遺黨韓樓復據幽州反

二年春二月甲午追尊皇考為文穆皇帝廟號肅祖皇妣為文穆皇后夏四月癸未遷文穆皇帝及文穆皇后

神主於太廟降畿內死罪已下刑辛丑上黨王天穆大
破邢杲於濟南杲降送赴京師斬於都市五月壬子朔
元顥剋梁國乙丑內外戒嚴癸酉元顥陷滎陽甲戌夜
車駕北巡乙亥幸河內景子元顥入洛丁丑進封城陽
縣公元祉為平原王安昌縣公元鷲為華山王戊寅太
原王尔朱榮會車駕於長子即日反旆上黨王天穆北
度會車駕於河內秋七月戊辰都督尔朱兆賀拔勝從
碓石夜濟破顥子冠受及安豐王延明軍元顥敗走庚

午車駕入居華林園升大夏門大赦壬申以柱國大將軍太原王尒朱榮為天柱大將軍癸酉臨潁縣卒江豐斬元顥傳首京師甲戌以前太尉上黨王天穆為太宰以司徒陽城王徽為大司馬太尉己卯以南青州刺史元旭為襄城王南兗州刺史元暹為汝陽王閏月辛巳帝始居宮內辛卯以兼吏部尚書楊津為司空八月己未以太傅李延實為司徒丁卯封瓜州刺史元太宗為東陽王九月大都督侯深破韓樓於薊斬之幽州平冬

十月乙酉朔日有蝕之丁丑以前司空丹陽王蕭贊為
司徒十一月己卯就德興自榮州遣使請降景午以大
司馬太尉城陽王徽為太保以司徒丹陽王蕭贊為太
尉以雍州刺史長孫承業為司徒

三年夏四月丁卯雍州刺史介朱天光討万俟醜奴蕭
寶夤於安定破禽之囚送京師甲戌以關中平大赦斬
醜奴於都市賜寶夤死六月戊午嚙嚙國獻師子一是
月白馬龍涸胡王慶雲僭稱帝號於永洛城秋七月景

子尔朱天光平永洛城禽慶雲九月辛卯天柱大將軍
尔朱榮上黨王天穆自晉陽來朝戊戌帝殺榮天穆於
明光殿及榮子菩提乃升閭闔門大赦遣武衛將軍奚
毅前燕州刺史侯深率衆鎮北中是夜左僕射尔朱世
隆榮妻北鄉郡長公主率榮部曲自西陽門出屯河陰己
亥攻河橋禽毅等屠害之據北中城南逼京師冬十月
癸卯朔封大鴻臚卿寶炬為南陽王汝陽縣公脩為平
陽王新陽伯誕為昌樂王琅邪公昶為太原王甲辰徙

封魏郡王。謚為趙郡王。謚弟子趙郡王寘為平昌王。戊申皇子生。大赦。乙卯。通直散騎常侍李苗以火船焚河橋。尔朱世隆退走。壬申。世隆停建興之高都。尔朱兆自晉陽來會之。共推長廣王暉為主。大赦所部。年號建明。徐州刺史尔朱仲遠反。率眾向京師。十一月己亥。以司徒長孫承業為太尉。以臨淮王彧為司徒。景子進雍州刺史。廣宗郡公尔朱天光爵為王。十二月甲辰。尔朱兆尔朱度律自富平津上。率騎涉度。以襲京城。事出倉卒。

禁衛不守帝步出雲龍門北逼帝幸永寧寺殺皇子亂
兵殺司徒臨淮王彧左僕射范陽王誨戊申尔朱度律
自鎮京師甲寅尔朱兆遷帝於晉陽甲子帝遇弒於城
內三級佛寺時年二十四并害陳留王寬中興二年廢
帝奉謚為武懷皇帝及孝武立又以廟諱故改謚孝莊
皇帝廟號敬宗葬靜陵

節閔皇帝諱恭字修業廣陵惠王羽之子也母曰王氏
帝少有志度事祖母嫡母以孝聞正始中襲爵位給事

黃門侍郎帝以元叉擅權托言瘖病絕言垂一紀居於
龍化佛寺無所交通永安末有白莊帝言帝不語將有
異圖人間遊聲又云常有天子氣帝懼禍遂逃匿上洛
尋見追躡送京師拘禁多日以無狀獲免及莊帝崩
朱世隆等以元曄踈遠又非人望所推以帝有過人之
量將謀廢立恐實不語乃令帝所親申意兼迫脅帝曰
天何言哉世隆等大悅及元曄至邙南世隆等奏帝東
郭外行禪讓禮太尉介朱度律奉路車進璽紱服袞冕

百官侍衛入自建春雲龍門

普泰元年春二月己巳皇帝即位於太極前殿羣臣拜
賀禮畢遂登閭闔門大赦以魏為大魏改建明二年為
普泰元年罷稅市及稅鹽之官庚午詔曰自秦之末競
為皇帝忘負乘之深殃垂貪鄙於萬葉予今稱帝己為
褒矣可普告令知是月鎮遠將軍清河崔祖螭聚青州
七郡之衆圍東陽幽州刺史劉靈助起兵於薊河北大
使高乾及其弟昂夜襲冀州執刺史元寔共推前河內

太守封隆之行州事三月癸酉封長廣王暉為東海王
以青州刺史魯郡王肅為太師沛郡王欣為太傅司州
牧改封淮陽王以徐州刺史彭城王尒朱仲遠雍州刺
史隴西王尒朱天光並為大將軍以柱國大將軍并州
刺史潁川王尒朱兆為天柱大將軍封晉州刺史平陽
郡公高歡為勃海王以特進清河王亶為太傅以尚書
令樂平王尒朱世隆為太保以趙郡王謨為司空景申
定州刺史侯深破劉靈助於安國城斬之傳首京師夏

四月壬子享太廟癸亥隴西王尒朱天光破宿勒明達

禽送京師斬之景寅以侍中尒朱彥伯為司徒詔有司

不得復稱偽梁罷細作之條無禁隣國還徃五月景子

尒朱仲遠使其都督魏僧勗等討崔祖螭於東陽斬之

六月己亥朔日有蝕之庚申勃海王高歡起兵信都以

誅尒朱氏為名秋七月壬申尒朱世隆等害前太保楊

椿前司空楊津景戌司徒尒朱彥伯以旱遜位九月以

彭城王尒朱仲遠為太宰庚辰以隴西王尒朱天光為

大司馬癸巳追尊皇考為先帝皇妣王氏為先太妃封
皇弟永業為高密王皇子子恕為勃海王冬十月壬寅
高歡推勃海太守元朗即皇帝位於信都

二年春閏二月高歡敗尔朱天光等於韓陵夏四月辛
巳高歡與廢帝至芒山使魏蘭根慰喻洛邑且觀帝之
為人蘭根忌帝雅德還致毀謗竟從崔悛議廢帝於崇
訓佛寺而立平陽王修是為孝武帝帝既失位乃賦詩
曰朱門久可患紫極非情翫顛覆立可待一年三易換

時運正如此惟有修真觀五月景申帝遇弒殂於門下
外省時年三十五孝武帝詔百司赴會葬用王禮加九
旒鑾輅黃屋左纛班劍百二十人後西魏追謚節閔皇
帝

廢帝諱朗字仲哲章武王融第三子也母曰程氏帝少
稱明悟元暉建明二年正月戊子為勃海太守普泰元
年十月勃海王高歡奉帝以主號令

中興元年冬十月壬寅皇帝即位於信都西大赦改普

泰元年為中興以勃海王高歡為丞相都督中外諸軍事以河北大使高乾為司空辛亥高歡大破尔朱兆於廣阿十一月梁將元樹入據譙城

二年春二月甲子以勃海王高歡為大丞相柱國大將軍太師及歡敗尔朱氏於韓陵四月辛巳帝於河陽遜位於別邸五月孝武封帝為安定郡王十一月殂於門下外省時年二十永熙二年葬於鄴西南野馬崗

孝武皇帝諱修字孝則廣平武穆王懷之第三子也母

曰李氏帝性沉厚學涉好武事遍體有鱗文年十八封汝陽縣公夢人有從諱謂已曰汝當大貴得二十五年永安三年封平陽王普泰中為侍中尚書左僕射中興二年高歡既敗尔朱氏廢帝自以踈遠請遜大位歡乃與百寮議以孝文不可無後時召汝南王悅於梁至將立之宿昔而止又諸王皆逃匿帝在田舍先是嵩山道士潘彌望見洛陽城西有天子氣候之乃帝也於是造第密言之居五旬而高歡使斛斯椿求帝椿從帝所親

王思政見帝帝變色曰非賣我耶椿遂以白歡歡遣四
百騎奉迎帝入氊帳陳誠泣下霑襟讓以寡德歡再拜
帝亦拜歡出備服御進湯沐達夜嚴警昧爽文武執鞭
以朝使斛斯椿奉勸進表椿入帷門聲折延首而不敢
前帝令思政取表曰視此便不得不稱朕矣於是假廢帝
安定王詔策而禪讓焉即位於東郭之外用代都舊制
以黑氊蒙七人歡居其一帝於氊上西向拜天訖自東
陽雲龍門入

永熙元年夏四月戊子皇帝御太極前殿羣臣朝賀禮
畢升閭闔門大赦改中興二年為太昌元年壬辰高歡
還鄴五月景申節閔帝殂以太傅淮陽王欣為太師改
封沛郡王以司徒趙郡王諶為太保以司空南陽王寶
炬為太尉以太保長孫承業為太傅辛丑復前司空高
乾位己酉以儀同三司清河王亶為司徒乙卯內外解
嚴六月癸亥朔帝於華林園納訟丁卯南陽王寶炬坐
事降為驃騎大將軍開府以王歸第己卯臨顯陽殿納

詔景戌詔曰間者凶權誕恣法令變常遂立夷貊輕賦
冀收天下之意隨以箕歛之重終納十倍之征掩目捕
雀何能過此今歲租調且兩收一丐明年復舊秋七月
庚子以南陽王寶炬為太尉乙卯帝臨顯陽殿親理冤
獄是月東南道大行臺樊子鵠大破梁軍於譙城禽其
將元樹八月丁卯封西中郎將元寧為高平王九月癸
卯進燕郡公賀拔允爵為王癸丑改封沛郡王欣為廣
陵王節閔子勃海王子恕為沛郡王冬十月辛酉朔日

有蝕之十一月丁酉祀園丘甲辰殺安定王朗及東海王暉己酉以汝南王悅為侍中大司馬開府葬太后胡氏十二月丁亥殺大司馬汝南王悅大赦改元為永興以同明元時年號尋改永熙是歲蠕蠕噉啞高麗契丹庫莫奚高昌等國並遣使朝貢

二年春正月庚寅朔朝饗羣臣於太極前殿丁酉勃海王高歡大敗尔朱氏山東平罷諸行臺丁巳追尊皇考為武穆皇帝太妃馮氏為武穆皇后皇妣李氏曰皇太

妃二月以咸陽王坦為司空三月甲午太師魯郡王肅
薨丁巳以太保趙郡王諶為太尉以太尉南陽王寶炬
為尚書令太保開府是月阿至羅十萬戶內附詔復以
勃海王高歡為大行臺隨機裁處夏四月己未朔日有
蝕之秋七月壬辰以太師廣陵王欣為大司馬以太尉
趙郡王諶為太師並開府庚戌以前司徒燕郡王賀拔
允為太尉冬十月癸未以衛將軍瓜州刺史秦臨縣伯
高昌王麴子堅為儀同三司進爵郡公十二月丁巳狩

於嵩陽士卒寒苦已已遂幸溫湯丁丑還宮

三年春二月壬戌大赦壬午封左衛將軍元斌之為潁川王夏四月癸丑朔日有蝕之辛未高平王寧坐事降爵為公五月景戌置勳府庶子箱別六百人騎官箱別二百人閣内部曲數千人帝內圖高歡乃以斛斯椿為領軍使與王思政等統之以為心膂軍謀朝政咸決於椿分置督將及河南關西諸刺史辛卯下詔戒嚴揚聲伐梁實謀北討是夏契丹高麗吐谷渾並遣使朝貢秋

七月己丑帝親總六軍十餘萬次河橋高歡引軍東度
景午帝率南陽王寶炬清河王亶廣陽王湛斛斯椿以
五千騎宿於漣西楊王別舍沙門都維那惠臻負壘持
千牛刀以從有牛百頭盡殺以食軍士衆知帝將出是
夜亡者過半清河廣陽二王亦逃歸畧陽公宇文泰遣
都督駱超李賢和各領數百騎赴難駱超先至甲戌賢和
會帝於崤中己酉高歡入洛遣婁昭及河南尹元子思
領左右侍官追帝請迴駕高昂率勁騎及帝於陝西帝

鞭馬長驚至湖城饑渴甚有王思邨人以麥飯壺漿獻
帝帝甘之復一邨十年是歲二月熒惑入南斗衆星北
流羣鼠浮河向鄴梁武跣而下殿以禳星變及聞帝之
西慙曰虜亦應天乎帝至稠桑潼關大都督毛洪賓迎
獻食八月宇文泰遣大都督趙貴梁禦甲騎二千來赴
乃奉迎帝過河謂禦曰此水東流而朕西上若得重謁
洛陽廟是卿等功也帝及左右皆流涕宇文泰迎帝於
東陽帝勞之將士皆呼萬歲遂入長安以雍州公廨為

宮大赦甲寅高歡推司徒清河王亶為大司馬承制總
萬機居尚書省歡追車駕至潼關九月己酉歡東還洛
陽帝親督衆攻潼關斬其行臺華長瑜又剋華州其冬
十月高歡推清河王亶子善見為主徙都鄴是為東魏
魏於此始分為二帝之在洛也從妹不嫁者三一曰平
原公主明月南陽王同產也二曰安德公主清河王懌
女也三曰蒺藜亦封公主帝內宴令諸婦人詠詩或詠
鮑照樂府曰朱門九重開九閨願逐明月入君懷帝既

以明月入關蒞藜自縊宇文泰使元氏諸王取明月殺之帝不悅或時彎弓或時推案君臣由此不安平閏十二月癸巳潘彌奏言今日當慎有急兵其夜帝在逍遙園宴阿至羅顧侍臣曰此處彷彿華林園使人聊增悽惋命取所乘波斯騮馬使南陽王躍之將攀鞍蹶而死帝惡之日宴還宮至後門馬驚不前鞭打入謂潘彌曰今日幸無他不彌曰過夜半則大吉須臾帝飲酒遇醜而崩時年二十五謚曰孝武殯於草堂佛寺十餘年乃

葬雲陵始宣武孝明間謠曰狐非狐貉非貉焦梨狗子
齧斷索識者以為索謂本索髮焦梨狗子指宇文泰俗
謂之黑獺也

文皇帝諱寶炬孝文皇帝之孫京兆王愉之子也母曰
楊氏帝正始初坐父愉罪兄弟皆幽宗正寺及宣武崩
乃得雪正光中拜直閣將軍時胡太后多嬖寵帝與明
帝謀誅之事泄免官武泰中封邵縣侯永安三年進封
南陽王孝武即位拜太尉加侍中永熙二年進位太保

開府尚書令三年孝武與高歡構難以帝為中軍四面
大都督及從入關拜太宰錄尚書事孝武崩丞相略陽
公宇文泰率羣公卿士奉表勸進三讓乃許焉

大統元年春正月戊申皇帝即位於城西大赦改元追
尊皇考為文景皇帝皇妣楊氏為皇后己酉進丞相畧
陽公宇文泰都督中外諸軍錄尚書事大行臺改封安
定郡公以尚書令斛斯椿為太保廣平王贊為司徒乙
卯立妃乙氏為皇后立皇子欽為皇太子甲子以廣陵

王欣為太傅以儀同三司万俟壽樂干為司空東魏將
侯景攻陷荊州二月前南青州刺史大野拔斬兗州刺
史樊子鵠以州降東魏夏五月降罪人加安定公宇文
泰位柱國秋七月以開府儀同三司念賢為太尉以司
空万俟壽樂干為司徒以開府儀同三司越勒肱為司
空梁州刺史元羅以州降梁九月有司請煎御香澤須
錢萬貫帝以軍旅在外停之冬十月太師上黨王長孫
承業薨十二月以太尉念賢為太傅以湖州刺史梁景

睿為太尉

二年春正月辛亥祀南郊改以神元皇帝配東魏攻陷
夏州二月儀同三司段敬討叛羌梁仙定平之三月以
涼州刺史李叔仁為司徒以司徒万俟樂壽干為太宰
夏五月司空越勒肱薨秦州刺史建中王万俟普撥及
其子太宰壽樂干率所部歸東魏秋九月以扶風王孚
為司空以太保斛斯椿為太傅冬十一月追改始祖神
元皇帝為太祖道武皇帝為烈祖是歲關中大饑人相

食死者十七八

三年春二月槐里獲神壘大赦夏四月太傅斛斯椿薨
五月以廣陵王欣為太宰賀拔勝為太師六月以司空
扶風王孚為太保以太尉梁景叡為太傅以司徒廣平
王贊為太尉以開府儀同三司王盟為司空冬十月安
定公宇文泰大破東魏軍於沙苑拜泰柱國大將軍十
二月司徒李叔仁自梁州通使於東魏建昌太守賀蘭
植攻斬之

四年春正月辛酉拜天於清暉室終帝世遂為常二月
東魏攻陷南汾潁豫廣四州廢皇后乙氏三月立蠕蠕
女郁久閭氏為皇后大赦以司空王盟為司徒秋七月
東魏將侯景等圍洛陽帝與安定公宇文泰東伐九月
車駕至自東伐以撫軍將軍梁仙定為南洮州刺史安
西蕃

五年春二月赦京城內夏五月以開府儀同三司李弼
為司空免妓樂雜役之徒皆從編戶秋七月詔自今恒

以朔望親閱京師見禁囚徒以司空扶風王孚為太尉
冬十月於陽武門外縣鼓置紙筆以求得失

六年春正月庚戌朝羣臣自西遷至此禮樂始備太尉
扶風王孚薨二月鑄五銖錢降罪人冬十一月太師念
賢薨

七年春二月幽州刺史順陽王仲景以罪賜死三月夏
州刺史劉平謀反大都督于謹討禽之秋九月詔班政
事之法六條冬十一月叛羌梁仙定徒黨屯於赤水城

秦州刺史獨孤信擊平之尚書奏班十二條制十二月御憑雲觀引見諸王敘家人之禮手詔為宗誠十條以賜之

八年春三月初置六軍夏四月鄴善王兄鄴朱邗率衆內附秋八月以太尉王盟為太保冬十月詔皇太子鎮河東十二月行幸華州起萬壽殿於沙苑北

九年春正月降罪人禁中外及從母兄弟姊妹為婚閏月車駕至自華州二月東魏北豫州刺史高仲密據武

牢內附以仲密為侍中司徒封勃海郡公秋七月大赦以太保王盟為太傅以太尉廣平王贊為司空冬十二月以司空李弼為太尉

十年春正月甲子詔公卿以下每月上封事三條極言得失刺史二千石銅墨以上有讜言嘉謀勿有所諱夏五月太師賀拔勝薨秋七月更權衡度量

十一年夏五月太傅王盟薨詔諸鞠大辟獄皆命三公覆審然後加刑冬始築園丘於城南封皇子儉

十二年春二月涼州刺史宇文仲和反秦州刺史獨孤
信討平之三月鑄五銖錢夏五月詔女年不滿十三以
上勿得以嫁秋九月東魏勃海王高歡攻玉壁晉州刺
史韋孝寬力戰禦之冬十二月歡燒營而退

十三年春正月開白渠以溉田二月詔自今應宮刑者
直沒官勿刑亡奴婢應黥者止科亡罪以開府儀同三
司若干惠為司空東魏勃海王高歡薨其司徒侯景據
潁川率河南六州內附授景太傅河南大行臺上谷郡

公三月大赦夏五月以太傅侯景為大將軍以開府儀同三司獨孤信為大司馬晉王謹薨秋七月司空若干惠薨大將軍侯景據豫州叛封皇子寧為趙王

十四年春正月赦潁豫廣北洛東荆襄等七州以開府儀同三司趙貴為司空皇孫生大赦夏五月以安定公宇文泰為太師廣陵王欣為太傅太尉李弼為大宗伯前太尉趙貴為大司寇以司空于謹為大司空

十五年己巳五月侯景殺梁武帝初詔諸代人太和中

改姓者並令復舊六月東魏勃海王高澄攻陷潁川秋
八月盜殺東魏勃海王高澄冬十二月封梁雍州刺史
岳陽王蕭譽為梁王

十六年夏四月封皇子儒為燕王公為吳王五月東魏
靜帝遜位於齊秋七月安定公宇文泰東伐至恒農齊
師不出乃還九月大赦

十七年春三月庚戌帝崩於乾安殿時年四十五夏四
月庚辰葬於永陵上謚曰文皇帝帝性強果始為太尉

時侍中高隆之恃勅海王高歡之黨驕狎公卿因公會
帝勸酒不飲怒而歐之罵曰鎮兵何敢爾也孝武以歡
故免帝太尉歸第命羽林守衛月餘復位及歡將改葬
其父朝廷追贈太師百僚會弔者盡拜帝獨不屈曰安
有生三公而拜贈太師耶及躋大位權歸周室嘗登道
遙觀望嵯峨山因謂左右曰望此令人有脫屣之意若
使朕年五十便委政儲宮尋山餌藥不能一日萬機也
既而大運未終竟保天祿云

廢帝諱欽文皇帝之長子也母曰乙皇后大統元年正月乙卯立為皇太子十七年三月即皇帝位是月梁邵陵王蕭綸侵安陸大將軍楊忠討禽之

元年冬十一月梁湘東王蕭繹討侯景禽之遣其舍人魏彥來告仍嗣位於江陵

二年秋八月大將軍尉遲迴克成都劔南平冬十一月安定公宇文泰殺尚書元烈

三年春正月安定公宇文泰廢帝而立齊王廓帝自元

烈之誅有怨言淮安王育廣平王贊等並垂泣諫帝不聽故及於辱

恭皇帝諱廓文皇之第四子也大統十四年封為齊王廢帝三年正月即皇帝位改元

元年夏四月蠕蠕乙旃達官寇廣武五月柱國李弼追擊之斬首數千級收輜重而還冬十一月魏師滅梁戕梁元帝梁太尉王僧辯奉元帝子方智為王承制居建

業

二年秋七月梁太尉王僧辯納貞陽侯蕭明於齊奉以
為主梁王方智為太子九月梁司空陳霸先殺僧辯廢
蕭明復奉方智為帝是歲梁廣州刺史王琳寇邊大將
軍豆盧寧率師討之

三年春正月丁丑初行周禮建六官以安定公宇文泰
為太師冢宰以柱國李弼為大司徒趙貴為太保大宗
伯以尚書令獨孤信為大司馬以于謹為大司寇以侯
莫陳崇為大司空冬十月乙亥安定公宇文泰薨十二

月庚子帝遜位於周

周閔帝元年正月封帝為宋公尋殂

東魏孝靜皇帝諱善見清河文宣王亶之世子也母曰

胡妃永熙三年八月拜開府儀同三司孝武帝既入關

勃海王高歡乃與百僚會議推帝以奉明帝之後時年

十一

天平元年冬十月景寅皇帝即位於城東北大赦改元
庚午以太師趙郡王諶為大司馬以司空咸陽王坦為

太尉以開府儀同三司高威為司徒以開府儀同三司

高昂為司空壬申享太廟景子車駕北遷於鄴詔勃海

王高歡留後部分改司州為洛州以尚書令元弼為儀

同三司洛州刺史鎮洛陽十一月兗州刺史樊子鵠南

青州刺史大野拔據瑕丘反庚寅車駕至鄴居北城相

州之解改相州刺史為司州牧魏郡太守為魏尹徙鄴

舊人西徑百里以居新遷人分鄴置臨漳縣以魏郡林

慮廣平陽丘汲郡黎陽東濮陽清河廣宗等郡為皇畿

十二月丁卯燕郡王賀拔允薨庚午詔內外戒嚴百司
悉依舊章從容雅服不得以務衫從事景子進侍中封
隆之等五人為大使巡喻天下丁丑赦畿內閏月梁以
元慶和為魏王入據平瀨鄉孝武崩於長安初置四中
郎將於礪石橋置東中蒲泉置西中濟北置南中洺水
置北中

二年春正月乙亥兼尚書右僕射東南道行臺元宴討
元慶和破走之二月壬午以太尉咸陽王坦為太傅以

司州牧西河王侗為太尉己丑前南青州刺史大野拔
斬樊子鵠以降兗州平戊戌梁司州刺史陳慶之寇豫
州刺史堯雄擊走之三月辛酉以司徒高盛為太尉以
司空高昂為司徒濟陰王暉業為司空勃海王高歡討
平山胡劉蠡升辛未以旱故詔京邑及諸州郡縣收瘞
骸骨是春高麗契丹並遣使朝貢夏四月前青州刺史
侯梁反攻掠青齊癸未濟州刺史蔡雋討平之壬辰降
京師見囚夏五月大旱勒城門殿門及省府寺署坊門

澆人不簡王公無限日得雨乃止六月元慶和寇南頓
豫州刺史堯雄大破之秋七月甲戌封汝南王悅孫綽
為琅邪王八月辛卯司空濟陰王暉業坐事免甲午發
衆七萬六千人營新宮九月丁巳以開府儀同三司襄
城王旭為司空冬十月丁未梁柳仲禮寇荊州刺史王
元擊破之癸丑祀圜丘甲寅閭闔門災龍見并州人家
井中十二月壬午車駕狩於鄴東甲午文武百官量事
各給祿是歲西魏文帝大統元年也

三年春正月癸卯朔饗羣臣於前殿戊申詔百官舉士
舉不稱才者兩免之二月丁未梁光州刺史郝樹以州
內附丁酉加勃海王世子澄為尚書令大行臺大都督
三月甲寅以開府儀同三司華山王鷲為大司馬丁卯
陽夏太守盧公纂據郡南叛大都督元整破之夏四月
丁酉昌樂王誕薨五月癸卯賜鰥寡孤獨貧窮者衣物
各有差景辰以錄尚書事西河王悰為司州牧戊辰太
尉高盛薨六月辛巳趙郡王諶薨秋七月庚子大赦梁

夏州刺史田獨鞞潁川防城都督劉鸞慶並以州內附
八月並肆涿建四州霜賈大饑九月壬寅以定州刺史

侯景兼尚書右僕射南道行臺節度諸軍南討景辰平

陽人路季禮聚衆反辛酉御史中尉竇泰討平之冬十

一月戊申詔遣使巡檢河北流移飢人侯景攻剋梁楚

州獲刺史桓和十二月以并州刺史尉景為太保辛未

遣使者板假老人官百歲以下各有差壬申大司馬清

河王亶薨癸未以太傅咸陽王坦為太師是歲高麗勿

吉並遣使朝貢

四年春正月以汝南王暹為錄尚書事夏四月辛未遷
七帝神主入新廟大赦內外百官普進一階先是滎陽
人張儉等聚眾反於大魏山通西魏壬辰武衛將軍高
元咸討破之六月己巳幸華林園理訟辛未詔尚書掩
骼埋胔推錄囚徒壬午閭闔門災秋七月甲辰遣兼散
騎常侍李楷聘於梁八月西魏剋陝州刺史李徽伯死
之九月侍中元子思與其弟子華謀西入並賜死閏月

乙丑衛將軍右光祿大夫蔣天樂謀反伏誅禁京師酤酒冬十月以咸陽王坦為錄尚書事壬辰勃海王高歡西討敗於沙苑己酉西魏行臺宮景壽都督楊白駒寇洛州大都督韓賢大破之西魏又遣其大行臺元季海大都督獨孤信逼洛州刺史廣陽王湛棄城歸闕季海信遂據金墉十一月景子以驃騎大將軍儀同三司万俟普為太尉十二月甲寅梁人來聘河間人邢磨納范陽人盧仲禮等各聚眾反是歲高麗蠕蠕並遣使朝貢

元象元年春正月辛酉朔日有蝕之有巨象自至碭郡
陂中南兗州獲送於鄴丁卯大赦改元二月景辰遣兼
散騎常侍鄭伯猷聘於梁夏四月庚寅曲赦畿內開酒
禁六月壬辰帝幸華林都堂聽訟秋七月乙亥高麗遣
使朝貢是夏山東大水蝦蟆鳴於樹上秋八月辛卯大
敗西魏於河陰九月大都督賀拔仁擊邢磨納盧仲禮
等破平之冬十月梁人來聘十二月庚寅遣陸操聘於

梁

興和元年春正月辛酉以尚書令孫騰為司徒三月甲寅朔封常山郡王劭第二子曜為陳郡王五月甲戌立皇后高氏乙亥大赦是月高麗遣使朝貢六月乙酉以尚書左僕射司馬子如為山東黜陟大使尋為東北道行臺差選勇士庚寅前潁川刺史奚思業為河南大使簡發勇士丁酉梁人來聘戊申開府儀同三司汝陽王暹薨秋八月壬辰遣兼散騎常侍王元景聘於梁九月甲子發畿內十萬人城鄴四十日罷辛未曲赦畿內死

罪已下各有差冬十一月癸亥以新宮成大赦改元八十已上賜綾帽及杖七十旁無耆親及有疾廢者各賜粟帛築城之夫給復一年

二年春正月壬申以太保尉景為太傅以驃騎大將軍開府儀同三司庫狄干為太保丁丑徙御新宮大赦內外百官並進一階營構主將別優一階三月乙卯梁人來聘夏五月己酉西魏行臺宮延和陝州刺史宮元慶率戶內屬置之河北馬場振廩各有差壬子遣兼散騎

常侍李象聘於梁閏月丁丑朔日有蝕之巳丑封皇兄
景植為宜陽王皇弟威為清河王謙為潁川王六月壬
子大司馬華山王鷲薨冬十月丁未梁人來聘十二月
乙卯遣兼散騎常侍崔長謙聘於梁是歲高麗蠕蠕勿
吉並遣使朝貢

三年春二月甲辰阿至羅出吐拔那渾太率部來降三
月乙酉梁州人公孫貴賓聚眾反自號天王陽夏鎮將
討禽之夏四月戊申阿至羅國主副伏羅越君子去賓

來降封為高車王六月乙丑梁人來聘秋七月己卯宜
陽王景植薨八月甲子遣兼散騎常侍李寯聘於梁先
是詔羣臣於麟趾閣議定新制冬十月甲寅班於天下
己巳發夫五萬人築漳濱堰三十五日罷癸亥車駕狩
於西山十一月戊寅還宮景戌以開府儀同三司彭城
王韶為太尉以度支尚書胡僧敬為司空是歲蠕蠕高
麗勿吉國並遣使朝貢

四年春正月景辰梁人來聘夏四月景寅遣兼散騎常

侍李繪聘於梁乙酉以侍中廣陽王湛為太尉以尚書
右僕射高隆之為司徒以太尉彭城王韶為錄尚書事
丁亥太傅尉景坐事降為驃騎大將軍開府儀同三司
辛卯以太保庫狄干為太傅以領軍將軍婁昭為大司
馬封祖裔為尚書右僕射六月景申復前侍中樂良王
忠爵丁酉復陳留王景皓常山王紹宗高密王永業爵
秋八月庚戌以開府儀同三司吏部尚書侯景為兼尚
書僕射河南行臺隨機討防冬十月甲寅梁人來聘十

一月壬午驃騎大將軍開府儀同三司青州刺史西河
王侗薨十二月辛亥使兼散騎常侍陽裴使於梁是歲
蠕蠕高麗吐谷渾並遣使朝貢

武定元年春正月壬戌朔大赦改元己巳車駕狩于邯
鄲之西山癸酉還宮二月壬申北豫州刺史高仲密據
武牢西叛三月景午帝親納訟戊申勃海王高歡大敗
西魏師于邙山追奔至恒農而還豫洛二州平夏四月
封彭城王韶弟襲為武安王五月壬辰以剋復武牢降

天下死罪已下囚乙未以吏部尚書侯景為司空六月
乙亥梁人來聘戊寅封前員外散騎侍郎元長春為南
郡王八月乙丑以汾州刺史斛律金為大司馬壬午遣
兼散騎常侍李渾聘於梁冬十一月甲午車駕狩於西
山乙巳還宮是歲吐谷渾高麗蠕蠕並遣使朝貢

二年春二月丁卯徐州人劉烏黑聚眾反遣行臺慕容
紹宗討平之三月梁人來聘以旱故宥死罪已下囚景
午以開府儀同三司孫騰為太保壬子以勃海王世子

高澄為大將軍領中書監元弼為錄尚書事以尚書左僕射司馬子如為尚書令以太原公高洋為左僕射夏五月甲午遣散騎常侍魏季景聘於梁丁酉太尉廣陽王湛薨秋八月癸酉尚書令司馬子如坐事免九月甲申以開府儀同三司濟陰王暉業為太尉太師咸陽王坦坐事免以王還第冬十月丁巳太保孫騰大司馬高隆之各為括戶大使凡獲逃戶六十餘萬十一月西河地陷有火出甲申以司徒高隆之為尚書令以前大司

馬婁昭為司徒庚子祀園丘辛丑梁人來聘是歲吐谷
渾地豆干室韋高麗蠕蠕勿吉並遣使朝貢

三年春正月景申遣兼散騎常侍李獎聘於梁二月庚
申吐谷渾國奉其從妹以備後庭納為容華嬪夏五月
甲辰大赦秋七月庚子梁人來聘冬十月遣中書舍人
尉瑾聘於梁十二月以司空侯景為司徒以中書令韓
軌為司空戊子以太保孫騰為錄尚書事是歲高麗吐
谷渾蠕蠕並遣使朝貢

四年夏五月壬寅梁人來聘六月庚子以司徒侯景為河南大行臺應機討防秋七月壬寅遣兼散騎常侍元廓聘於梁八月移洛陽漢魏石經於鄴是歲室韋勿吉地豆干高麗蠕蠕並遣使朝貢

五年春正月己亥朔日有蝕之景午勃海王高歡薨辛亥司徒侯景降於西魏以求救西魏遣其將李弼王思政赴之思政等入據潁川景乃出走豫州乙丑梁人來聘二月侯景復背西魏歸梁夏四月壬申大將軍高澄

來朝甲午遣兼散騎常侍李緯聘於梁五月丁酉朔大赦戊戌以尚書右僕射襄城王旭為太尉甲辰以太原公高洋為尚書令領中書監以青州刺史尉景為大司馬以開府儀同三司庫狄干為太師以錄尚書事孫騰為太傅以汾州刺史賀拔仁為太保以司空韓軌為司徒以領軍將軍可朱渾道元為司空以司徒高隆之錄尚書事以徐州刺史慕容紹宗為尚書左僕射高陽王斌為右僕射戊午大司馬尉景薨六月乙酉帝為勃海

王舉哀於東堂服總衰秋九月辛丑梁貞陽侯蕭明冠
徐州堰泗水於寒山灌彭城以應侯景冬十一月乙酉
以尚書左僕射慕容紹宗為東南道行臺與大都督高
岳潘相樂大破禽之及其二子瑀道十二月乙亥蕭明
至帝御闔闔門讓而宥之岳等迴師討侯景是歲高麗
勿吉並遣使朝貢

六年春正月己亥大都督高岳等於渦陽大破侯景俘
斬五萬餘人其餘溺死於渦水水為不流景走淮南二

月巳郊梁遣使求和許之三月癸巳以太尉襄城王旭
為大司馬以開府儀同三司高岳為太尉辛亥以冬春
亢旱赦罪人各有差夏四月甲子吏部令史張永和青
州人崔濶等偽假人官事覺糾檢首者六萬餘人甲戌
太尉高岳司徒韓軌大都督劉豐等討王思政於潁川
引洧水灌其城九月乙酉梁人來聘冬十月戊申侯景
濟江推梁臨賀王正德為主以攻建業是歲高麗室韋
蠕蠕吐谷渾並遣使朝貢

七年春正月戊辰梁北徐州刺史中山侯蕭正表以鎮
內附封蘭陵郡公吳郡王三月丁卯侯景剋建業夏五
月景辰侯景殺梁武帝戊寅勃海王高澄帥師赴潁川
六月剋之獲西魏大將軍王思政等秋八月辛卯立皇
子長仁為太子盜殺勃海王高澄癸巳大赦內外百官
並進二級甲午太原公高洋如晉陽冬十月癸未以開
府儀同三司咸陽王坦為太傅甲午以開府儀同三司
潘相樂為司空十二月甲辰吳郡王蕭正表薨己酉以

并州刺史彭樂為司徒是歲蠕蠕地豆干室韋高麗吐
谷渾並遣使朝貢

八年春正月辛酉帝為勃海王高澄舉哀於東堂戊辰
詔太原公高洋嗣事徙封齊郡王甲戌地豆干契丹並
遣使朝貢二月庚寅以尚書令高隆之為太保三月庚
申進齊郡王高洋爵為齊王夏四月乙巳蠕蠕遣使朝
貢五月甲寅詔齊王為相國總百揆備九錫之禮以齊
國太妃為王太后王妃為王后景辰帝遜位於齊

天保元年己未封帝為中山王邑一萬戶上書不稱臣
答不稱詔載天子旌旗行魏正朔乘五時副車封王諸
子為縣公邑各一千戶奉絹一萬疋錢一萬貫粟二萬
石奴婢三百人水碾一具田百頃園一所於中山國立
魏宗廟

二年十二月己酉中山王殂時年二十八

三年二月奉謚曰孝靜皇帝葬於鄴西漳北其後發之
陵崩死者六十人帝好文美容儀力能挾石師子以踰

墻射無不中嘉辰宴會多命羣臣賦詩從容沉雅有孝
文風勃海王高澄嗣事甚忌焉以大將軍中兵參軍崔
季舒為中書黃門侍郎令監察動靜小大皆令季舒知
澄與季舒書曰癡人復何似癡勢小差未帝嘗與獵於
鄴東馳逐如飛監衛都督烏那羅受工伐從後呼帝曰
天子莫走馬大將軍怒澄嘗侍帝飲大舉觴曰臣澄勸
陛下帝不悅曰自古無不亡之國朕亦何用此活澄怒
曰朕朕狗脚朕澄使季舒歐帝三拳奮衣而出明日澄

使季舒勞帝帝亦謝焉賜絹季舒未敢受以啓澄澄使
取一段帝東百匹以與之曰亦一段爾帝不堪憂辱詠
謝靈運詩曰韓亡子房奮秦帝魯連恥本自江海人志
義動君子常侍侍講荀濟知帝意乃與華山王大噐元
瑾密謀於宮中偽為山而作地道向北城至千秋門門
者覺地下響動以告澄澄勒兵入宮曰陛下何意反耶
臣父子功存社稷何負陛下耶及將殺諸妃嬪帝正色
曰王自欲反何關於我我尚不惜身何況妃嬪澄下床

叩頭大啼謝罪於是酣飲夜久乃出居三日幽帝於含
章堂大噐瑾等皆見烹於市及將禪位於文宣襄城王
昶及司徒潘相樂侍中張亮黃門郎趙彥深等求入奏
事帝在昭陽殿見之昶曰五行遞運有始有終齊王聖
德欽明萬姓歸仰臣等昧死聞奏願陛下則克禪舜帝
便歛容荅曰此事推挹已久謹當遜避又云若爾須作
詔書侍郎崔劼裴讓之奏云詔已作訖即付楊愔進於
帝凡十條書訖曰將安朕何所復若為而去楊愔對曰

在北城別有館宇還備法駕依常仗衛而去帝乃下御
座步就東廊口詠范蔚宗後漢書贊曰獻生不辰身播
國屯終我四百永作虞賓所司奏請發帝曰古人念遺
簪敝履欲與六宮別可乎高隆之曰今天下猶陛下之
天下况在後宮乃與夫人嬪以下訣莫不欷歔掩涕嬪
趙國李氏誦陳思王詩云王其愛玉體俱享黃髮期皇
后以下皆哭直長趙德以故犢車一乘候於東上閤帝
上車德超上車持帝帝肘之曰朕畏天順人授位相國

何物奴敢逼人趙德尚不及出雲龍門王公百僚衣冠拜辭帝曰今日不減常道鄉公漢獻帝衆皆悲愴高隆之灑泣遂入北城下司馬子如南宅及文宣行幸常以帝自隨帝后封太原公主嘗為帝嘗食以護視焉竟遇醜而崩

論曰莊宗運接交喪招納勤王雖時事孔棘而卒有四海猾逆剪除權強擅命神慮獨斷芒刺未除而天未忘亂禍不旋踵自茲之後魏室土崩始則制屈強胡終乃

權歸霸政主祭祀者不殊於寄坐遇黜辱者有甚於奕
碁雖以節閔之明孝武之長祗以速是奔波文帝以剛
強之質終以守恒自寶靜恭運終天祿高蹈唐虞各得
其時也

北史卷五

北史卷五考證

敬宗孝莊皇帝紀辛酉大將軍尔朱榮還晉陽帝餞於
邙陰○邙監本訛邙今改從魏書

又班募格收集忠勇有直言正諫之士者集華林園面
論時事○者字上脫數字應從魏書增入今各本俱
同仍之

甲戌夜車駕北巡○魏書無夜字

丁卯封瓜州刺史元太宗為東陽王○宗魏書作榮

遣武衛將軍奚毅前燕州刺史侯深率衆鎮北中○侯
深魏書作崔淵

丙子進雍州刺史廣宗郡公尒朱天光爵為王○據上
文十一月己亥十二月甲辰則此丙子應作庚子

節閔皇帝紀○此節閔皇帝魏書作前廢帝

討崔祖螭於東陽○祖監本訛袒今改從本傳

孝武皇帝紀○孝武皇帝魏書作出帝

己卯臨顯陽殿納訟○納監本訛訥今改正

泰臨縣伯高昌王麴子堅○麴監本訛趙今改正

以五千騎宿於湮西楊王別舍○湮監本訛湮字書無
湮字今改從閣本

文皇帝紀冬十月安定公宇文泰大破東魏軍於沙苑
○苑魏書齊書皆作苑今各本皆同仍之

十五年己巳五月○本書每年不紀干支此獨書之衍
文也

東魏孝靜皇帝紀先是滎陽人張儉等聚衆反於大駝

山通西魏壬辰武衛將軍高元咸討破之○魏書醜作醜咸作盛

秋七月乙亥高麗遣使朝貢是夏山東大水蝦蟆鳴於樹上○是夏下十二字魏書本在秋七月上

癸酉還宮二月壬申○上文春正月壬戌朔則二月安得有壬申此必有誤

天保元年己未封帝為中山王○臣人龍按此五月也


己未上不書月殆以齊顯祖文宣皇帝天保元年即

孝靜帝武定八年而五月甲寅詔齊王總百揆丙辰
遜位於齊已見於上文故耶

北史卷五考證

謹案卷四第九頁前七行朝臣講維摩詰經刊本
脫摩字今增

卷五第七頁前二行散騎常侍李苗刊本苗詭留
今改



覆校官編修 臣 劉種之

校對官修撰 臣 張書勳

謄錄監生 臣 陸學稼